

JAUNAREN BATEOA

SARRERAKO OHARRA

Senideok: Gabon-jaiak burutuz, urtean zeharreko domekei ekiteko, Liturgiak Jaunaren BATEOA proposatzen deusku, bateoa zeozeren hasierea edo zertan-hartan oina jartea balitz lez. Eta ikusiko dogu zertan, gogoz ospatzen badogu eta gure Bateoaren barri eta ardurea hartzen badogu.

Buru-belarri sartu gaitezkan eukaristiaren ospakuntza honetan Jainkoaren esanetara jarteko asmotan eta gogo beroagaz. Ondo etorri.

SARRERAKO ABESTIA

Jainko gizon eginari,
agur, ospe, onespina;
Jesukristo erregeri
esker, otoitz, maitasuna (bir).

DAMU OTOITZA

Egun egokia da gaurkoa Damu Otoitz lez uraren Bedeinkapena eta zipriztintzea egiteko.

Abadeak:

Dei egin deiogun, anai-arrebok, Jaungoiko Aitari, ur hau bedeinkatu dagian. Gure bateoaren gomutaz isuriko da gure gainera. Eskatu deiogun Jaunari barriztau gaziala barrutik, hartu dogun Espirituari zintzoak izan gakiozan.

Otoitz egiteko isilunea

Ontasunaren eta errukiaren Jaungoikoa. Bizi-iturri eta garbitzeko tresna dan uraren bitartez gu pekatutik garbitzea eta betiko bizitzaren dohaina guri emotea gura izan zenduan. Bedeinkatu † egizu ur hau, Jauna, zure babesaren ezaugarri izan daiten, Zuri eskeinitako egun honetan. Ur honen bitartez, barriztau egizu guran zure graziaren iturri bizia, eta askatu gaizuz gatx guztietatik, bihotz garbiz bizi izan gaitezkan beti eta zure salbamena duintasunez hartu daigun. Jesu Kristo gure Jaunaren bitartez.

Amen.

Abadeak hisopoa hartuko dau eta bere burua zipriztindu ondoren, Batzar guztia zipriztinduko dau. Bien bitartean abesti egoki bat abestuko da.

Bateoko uretan, Jauna, gaituzu
pekatuak hil ta zeuretzat biztu.

R/. Bateoagaitik, eskerrik asko: seme-alaba egin gaituzulako.

Abadeak:

Jaungoiko ahalguztidunak garbitu gaizala pekatutik eta, Eukaristia honen ospakuntzaren bidez, egin gaizala bere Erreinuko otorduan esku hartzeko duin. Amen.

Lehenengo irakurgaiari (Is 42, 1-4. 6-7)

Hona Isaiasek emoten deuskun Jainkoaren morroi-irudia: Jainkoaren seme-alaba lez, hementxe aurkitu geike gure zeregina eta zeregin hori beteteko era: Espirituaren bultzadeak garoaz, eta ez inor baztertzeraz, Jainkoaren erreinuko ezaugarriak zabaltzeraz baino.

Erantzun salmoa

JAUNAREN BATEOA /B Ps 28

Be-re he-rr-i - a be-dein-ka - tu - ko dau ba-ke- a e - mo - nez Jau - nak.

Bigarren irakurgaiari (Eg 10, 34-38)

Nor da Jainkoak aintzat hartu eta maite dauana, Jainkoari (gizakion hizkeraz) atsegin emoten deustona: erlijio-betekizunetan dabilana ala bizitza zintzoa daroana? Pedroren berbotan aurkituko dogu erantzuna.

Ebanjelioari (Mk 1, 7-11)

Jesusegaz, ebanjelariaren esanetan, aldi barriak hasten dira: harek ez gaitu zemaipean hartuko Espirituarenugarretan baino, Jainkoagaz adiskideturik. Egin deiogun harrerea Aleluia abestuz, zutunik.

JAINKO HERRIAREN OTOITZA

† Jaunaren batean Jainkoak aukeratuak garala aurkitu dogu, eta eginkizun eder bat emoten deuskula: Osakuntza eta Deabruak uxatzea. Jo daigun otoitzera, hori gogoan:

- Eleizearen alde: Bere iragarpena proposamena izan daiten eta ez goitik-beherako ezarketea, eta, behartsuekaz bat eginda, danentzako dan Jainkoaren guraria bete daian, *eskatzen deusugu, Jauna. (R/. Aita-ama zaitugu-ta).*
- Nortasun bila edo euren burua ezagutu nahian dabizanen alde: Jesusek aurkitu eban Bateatzailearen antzeko dei-egileak aurkitu daiezan eta heldu daitezcan nora-ezean dabizenentzako eredu eta maisu izatera, *eskatzen deusugu, Jauna.*
- Euren burua salbatu nahian dabizcan hainbeste eta hainbeste sinistun kristauren alde: izan daien uste on Jainkoagan, somatu daien Espirituaren igurtzia, eta Jainko esperientzia sakon baten barri izan daien, *eskatzen deusugu, Jauna.*
- Gaixo, espetxeratu eta erbesterratu, bazterreratu edo desbideratuak izanik bizi diranen alde: benetako su-gar bihurtu daitezcan amatau hainean dagozan bateatu askoren bihotzetan, *eskatzen deusugu, Jauna.*
- Eukaristiaren mahai inguratzen dogunok Jesus Jaunagan hartu daigun eredu, geure eremuetatik urten eta ingurukoen bihotzak osatu eta diru-zalekeriak ezarri deuskuzan deabruak uxatu daiguzan, *eskatzen deusugu, Jauna.*

† Eginkizun eder bat emoteraino gudan uste ona dozun Jainko Jauna: emoiguzu hori sinistea eta gure egunerokoan gauzatzea. Jesukristo gure Jaunaren bitartez.
—Amen.

OHARRAK

Azken abestia

Eskerrik asko, Jauna, bihotz-bihotzetik...